

# TEZAU LITURGIC

7 IULIE

# ACATISTUL SF. CUVIOASE EVDOCHIA- EUFROSINA DE LA MOSCOVA II



MOSCOVA, 2000



**Акафист**  
**второй преподобной Евфросинии,**  
**великой княгине Московской**

**Кондак 1**

Избранней от рода державнаго, преславнаго града Москвы покровительнице и всея Российския страны молитвеннице, похвальное пение приносим ти, угоднице Христова Евфросиние. Ты же, яко имущая дерзновение ко Господу, Того умоли избавитя нам бед и скорбей и в будущем веце Царствия Небеснаго наследники быти, да зовем ти:

Радуйся, преподобная княгине Евфросиние, жен российских красото и радование.

**Икос 1**

Ангелов Творец и Господь, предуведевый благое произволение твое, избра ты, благоверная княгине Евфросиние, во образ милосердия и благочестия женам Российским, да вси оне, зряще твое терпение, любовь и богоугодное житие, во умилении сердец взывают ти тако:

Радуйся, родителей благочестивых Димитрия и  
Анны чадо благословенное.

Радуйся, цвете благоуханный, во граде Суздали  
возвращенный.

Радуйся, именем Евдокии, сиречь  
благоволение, в крещении нареченная.

Радуйся, от юности твоя благодати  
преисполненная.

Радуйся, отроковице, в вере и благочестии  
воспитанная.

Радуйся, ангельски на земли пожившая.

Радуйся, яко злато в огне искушений и скорбей  
очищенное.

Радуйся, образ праведных благоверных  
княгини всем русским людям показавшая.

Радуйся, града Москвы хранительнице и  
заступнице.

Радуйся, Церкви Российской преславное  
украшение.

Радуйся, радости Царства Небесного  
сподобившаяся.

Радуйся, дерзновенная о нас пред Богом молитвеннице.

Радуйся, преподобная княгине Евфросиние, жен российских красото и радование.

## Кондак 2

Видя святитель Московский Алексей непорочную душу твою, ум и красоту, богоизбранная отроковице, яко невесту добру вручи ты Великому князю Димитрию Ивановичу, да будеши материю народу державы его, научаючи всяк возраст верных славити и воспевати Богу: Аллилуиа.

## Икос 2

Разум во благочестии утвержден имущи, блаженная мати, не земныя радости в супружестве взыскавши, но паче супругу в добродетелех подражавши и того к делом добрым подвизавши, милосердие и любовь к людем стольнаго града показала еси. И бысть радость велия в народе о браце сем, и вси прославляху Бога, и радовахуся о тебе, и вопияху ти, глаголюще:

Радуйся, от юности Бога всем сердцем возлюбившая.

Радуйся, евангельских заповедей верная исполнительнице.

Радуйся, великих святых земли Русския духовная ученице.

Радуйся, преподобным Сергием в житии праведнем наставленная.

Радуйся, на брак первосвятителем Российским Алексием напутствованная.

Радуйся, послушание своему духовному наставнику явившая.

Радуйся, с супругом твоим в любви и благочестии пожившая.

Радуйся, в супружестве благочестием житии крепкая помощнице.

Радуйся, чада твоя в вере и страхе Божии воспитавшая.

Радуйся, богобоязненному воспитанию и нас научающая.

Радуйся, жен благочестивых украшение.

Радуйся, любви и кротости Христовы совместилице.

Радуйся, преподобная княгине Евфросиние, жен российских красото и радование.

### **Кондак 3**

Сила Божия укрепляше тя в служении народу твоему и невредиму сохрани, егда смертоносная язва многих людей окрест тебе поражаше, и многожды в нападениях врагов соблюдаше тя от меча их и пленения. Ты же вся сия претерпела еси, благодарственно воспеваючи Богу: Аллилуиа.

### **Икос 3**

Имуще сердце милостивое и к людем страждущим любовью преисполненное, многи слезы проливала еси, блаженная мати, в молитве пред Господем, да сохранит землю Русскую и град царствующий во дни бед и напастей, находящих от нашествия агарян и междоусобных браней князей русских, от смертоносных язвы, разорения и запаления. Темже поминающе твое теплое к Богу о людех ходатайство и скорую бедствующим помощь, вопием ти из глубины сердечных:

Радуйся, многи скорби претерпевшая.

Радуйся, в напастех на единого Господа упование возлагавшая.

Радуйся, гнев Божий молитвами твоими утолявшая.

Радуйся, в бедах помощь Божию обретавшая.

Радуйся, материнскую любовь к людям страждущим явившая.

Радуйся, обидимых и гонимых заступнице.

Радуйся, княгине благосердая, любовь свою всех покрывающая.

Радуйся, людям московским помощнице богодарованная.

Радуйся, к нищим и убогим милосердие неоскудное показавшая.

Радуйся, бедствующим благонадежное избавление.

Радуйся, людей российских надеждо и упование.

Радуйся, милосердия сокровище неисчерпаемое.

Радуйся, преподобная княгине Евфросиние, жен российских красото и радование.

## Кондак 4

Егда буря великаго нашествия агарянского потрясе землю Русскую, супруг твой Великий князь Димитрий советом преподобнаго Сергия утверждаем, не убоясь силы вражия и на подвиг ратный с полки своими устремися. Тогда вси людие русстии вкупе с тобою усердную молитву о избавлении страны своея вознесоша, воспевающе Богу песнь: Аллилуиа.

## Икос 4

Слышавше ближнии и дальнии людие, яко дарова Господь победу православному воинству в брани лютей на поли Куликове, плач свой на радость преложиша. Ты же, угоднице Божия, во вся дни похода полков русских неотступно предстояла еси в молитве и возликовала еси о спасении Отчизны твоея от нашествия иноплеменных. Темже и мы, радость победы сия приемше, о Господе радуемся, тебе же гласом хваления приносим таковая:

Радуйся, супруга твоего небоязненно тещи на битву благословившая.

Радуйся, о спасении земли Русския Господа умолявшая.

Радуйся, града Москвы твердое ограждение.

Радуйся, страны Российския верная защитнице.

Радуйся, о победе воинства русского со слезами молившаяся.

Радуйся, милостивая наша предстательнице.

Радуйся, великою победою на поли Куликове обрадованная.

Радуйся, в честь победы храм во имя Рождества Пресвятыя Богородицы создавшая.

Радуйся, христоробивому воинству необоримая помощнице.

Радуйся, отечества твоего светильниче пресветлый.

Радуйся, любовь велию ко Отечеству твоему земному явившая.

Радуйся, любовь сию и по смерти сохранившая.

Радуйся, преподобная княгине Евфросиние, жен российских красото и радование.

## Кондак 5

Боготечней звезде явилася еси подобна, святая мати, в житии твоём, егда супружеских уз свободившись, всецело Господу себе предала еси, постом, бдением и молитвами работаючи Ему дни и ночи и непрестанно вопиючи Создателю нашему: Аллилуиа.

## Икос 5

Видящи себе по смерти супруга сиротствующу, преподобная мати, возжелела еси поработати единому Богу, обаче, воспитания ради чад, до времени в княжеских чертозах пребываючи и о делех земных попечение имети понуждаема, умыслила еси в тайне Богу послужити, постом и бдением тело свое изнуряючи, людям же в светлых ризах себе являючи. Сего ради, воспоминающе твое благое изволение, с любовью величаем тя сице:

Радуйся, путь супружескаго богоугоднаго жития показавшая.

Радуйся, с верою и терпением крест вдовства твоего понесшая.

Радуйся, сыну твоему, в агарянском плену бывшему, спострадавшая.

Радуйся, молитвою и благодатию Божиею в скорби сей утешенная.

Радуйся, сыну твоему в управлении державы Российския мудрая помощнице.

Радуйся, во власти княжестей суету мирскаго жития уразумевшая.

Радуйся, во славе живущим правило христианскаго жития бывшая.

Радуйся, славы токмо на Небесех искавшая.

Радуйся, непрестанными молитвами Бога прославлявшая.

Радуйся, яко постом и молитвою плоть твою духови покорила еси.

Радуйся, в тайне Богу послужившая.

Радуйся, сокровенно от людей Тому угодившая.

Радуйся, преподобная княгине Евфросиние, жен российских красото и радование.

### **Кондак 6**

Проповедница святаго жития, в тайне совершаемаго, явилася еси, блаженная мати. Обаче дух лукавый, не терпя подвигов твоих, клеветами и злоречии возмути души чад твоих.

Ты же, преподобная, клеветы и поношения с терпением великим понесла еси, благодарно воспеваючи укрепившему тя Христу Богу: Аллилуиа.

## Икос 6

Возсия миру свет добродетелей твоих, преподобная мати, егда, видящи чад твоих злыми о тебе клеветами смущаемых, призва их тайно и часть одежд пред ними отккры, да увидят тело твое от поста изсохшее и очерненное и плоть костем прильпнувшу; и тако смущение от сердец их отгнавши, никомуже поведати виденнаго повелела еси. Сего ради, почитающе подвиги и труды твоя, поем тебе сице:

Радуйся, во вдовстве твоём чистоту непорочно сохранившая.

Радуйся, за ревность твою по Бозе в нечистоте жития оклеветанная.

Радуйся, яко в полунощи на молитву вставала еси.

Радуйся, во глубине смирения подвиги твоя от всех скрывавшая.

Радуйся, клеветы и хулы с благодарением потерпевшая.

Радуйся, к обидящим тя любовь сохранившая.

Радуйся, поношение безчестия терпением победившая.

Радуйся, обиды на людей суду Божию предавшая.

Радуйся, худыя помыслы чад твоих во благо исправившая.

Радуйся, во избежание славы, уста их молчанием заградившая.

Радуйся, смирением козни вражия разорившая.

Радуйся, блаженство гонимых за правду унаследившая.

Радуйся, преподобная княгине Евфросиние, жен российских красото и радование.

### **Кондак 7**

Хотя сын твой, Великий князь Василий во дни лютаго нашествия Тамерлана защитити державу Русскую, по совету твоему, княгине милостивая и богомудрая, повеле пренести в

Москву Владимирскую икону Богоматере. Тогда Пречистая Мать Господа, яко всемогущая Царица со множеством воинов явися агарянскому хану и от предел земли Русския отъйти повеле. Темже вси вернии, от погибели заступлением Божия Матери спасеннии, в веселии пояху благих Подателю Богу: Аллилуиа.

### **Икос 7**

Новое знамение милосердия Своего сотвори Пресвятая Владычица, егда странную победу над воинством Тамерлана без брани совершившуюся в день сретения в Москве Владимирския иконы Ея дарова державе нашей. Сего ради и до ныне Церковь Божия прославляет тя, преподобная мати Евфросиние, яко мудрую советницу и молитвенницу ко Господу и величает тя тако:

Радуйся, Пресвятая Богородицы усердная почитательнице.

Радуйся, ревностная печальнице пред Нею за вся страждущия русския люди.

Радуйся, со слезами Пречистую о заступлении умолявшая.

Радуйся, икону Владимирския Богоматере во град Москву пренести благословившая.

Радуйся, пришествием иконы сея возвеселившаяся.

Радуйся, до земли пред нею поклонившаяся.

Радуйся, яко молитва твоя ко Пресвятей Богородице о спасении Руси услышана бысть.

Радуйся, заступлением Пречистыя за землю Русскую обрадованная.

Радуйся, град Москву от бед и губительств сохраняющая.

Радуйся, к Богородице молитвеннице наша неусыпная.

Радуйся, о спасении державы Российския богоугодная предстательнице.

Радуйся, хранительнице земли нашея.

Радуйся, преподобная княгине Евфросиние, жен российских красото и радование.

### **Кондак 8**

Странное чудо сотвори Господь в явлении тебе Архистратига Божия Михаила, иже осия тя лучами света Небеснаго, душу твою ко исходу

уготовляя, и удержи язык твой. Егда же узрела еси, преподобная, третицею написанный образ явльшагося тебе Архистратига, разрешишася узы языка твоего и прославила еси Господа, творящаго дивная чудеса, поющи Ему песнь: Аллилуиа.

### Икос 8

Вся исполнена была еси ревности к Церкви Божией, преподобная мати Евфросиние, обители иноческия и храмы во славу Божию воздвигла еси, к нищим и убогим любовь стяжала еси и многими добродетельми душу твою обогатила еси, имиже житие твое яко цветами благоукрашается и духовно благоухает. Сего ради мы, тобою на путь веры и добродетели наставляемии, восхваляем тя сице:

Радуйся, архангельскаго посещения сподобившаяся.

Радуйся, явлением ангельским о отшествии твоём из жизни временныя извещенная.

Радуйся, сиянием архангельскаго света озаренная.

Радуйся, светило милосердия, над градом Москвою возшедшее.

Радуйся, благолепие храмов Божиих возлюбившая.

Радуйся, многих обителей и храмов в земли нашей устроительнице.

Радуйся, обитель во имя Вознесения Господня в Кремле создавшая.

Радуйся, тамо покой души твоея обретшая.

Радуйся, вдовицам и сиротам защитнице и мати благосердая.

Радуйся, милости и сострадания исполненная.

Радуйся, за любовь твою к людям велие дерзновение к Богу стяжавшая.

Радуйся, Царства Небеснаго и земнаго украшение.

Радуйся, преподобная княгине Евфросиние, жен российских красото и радование.

### **Кондак 9**

Всякое естество ангельское и человеческое возрадовашеся, зряще, како ты, преподобная мати, земную славу оставивши, в пристанище тихое — созданную тобою обитель Вознесения Господня вселилася еси, яко жертву

совершенную себе Богу приносящи. Темже в пострижении иночеством ангельский образ восприяла еси с именем Евфросинии, тезоименитой радости, да будеши радость страждущей стране Российской и верным ея чадам, поющим Богу ангельскую песнь: Аллилуиа.

### Икос 9

Витий многовещанных паче, глас народный немолчно славит тя, преподобная мати Евфросиние, ибо Сам Господь яви в тебе образ назидания не токмо в миру живущим, но и ликом иноческим. Ты же благодать Божию в иночестве восприяла еси, и новыми подвиги украсила еси житие твое. Темже дара исцелений от Бога сподобльшися, слепому подала еси прозрение и многих болящих исцелила еси. Мы же любовью и молитвою твоею ограждаеми и наставляеми, воспеваем тебе сице:

Радуйся, иноческое равноангельное житие возлюбившая.

Радуйся, ризы княжеския на власяницу иноческую пренившая.

Радуйся, ради Господа земнаго царства славу оставившая.

Радуйся, яко имя Евфросинии, сиречь радости, во иночестве получила еси.

Радуйся, во обитель, тобою созданную, вселившаяся.

Радуйся, богоугодно и праведно в ней пожившая.

Радуйся, прикосновением ризы твоея прозрение слепцу подавшая.

Радуйся, яко тридесяти недужным исцеление даровала еси.

Радуйся, в радость Господа твоего вшедшая.

Радуйся, вечную радость на Небеси обретшая.

Радуйся, радость истинную о Христе нам показавшая.

Радуйся, светом радости души наша озаряющая.

Радуйся, преподобная княгине Евфросиние, жен российских красото и радование.

## Кондак 10

Спасти хотя душу твою, житие земное равноангельно совершала еси, преподобная мати Евфросиние, в заповедех Божиих безпорочно ходящи, и дом Святаго Духа была еси. Темже по смерти твоей прослави тя Господь в лице святых благоверных княгинь и преподобных жен, с нимиже ныне Богу предстоящи, поеши хвалебную песнь: Аллилуиа.

## Икос 10

Стену небориму и заступление царствующему граду Москве и всей стране Российстей яви Господь ты, преподобная Евфросиние, ибо по отшествии твоём от земнаго бытия увенча ты и дарова благодать молиться с дерзновением о всех людех Российских, ищущих твоея помощи и заступления. Темже и нам, любовью чтущим ты, буди ограждение крепкое, да тобою от всех нападений вражиих избавльшися, со умилением зовем ти:

Радуйся, славу мира иноческим смирением поправшая.

Радуйся, о едином на потребу точию помышлявшая.

Радуйся, подвигом добрым подвизавшаяся.

Радуйся, крест богоугождения до конца понесшая.

Радуйся, в храме, тобою созданном, погребенная.

Радуйся, православными людьми града Москвы ублажаемая.

Радуйся, яко и по успении твоём нас не оставляеши.

Радуйся, яко свеща у гробницы твоея чудесно воспламенися.

Радуйся, непорочная голубице, от обители земныя в Небесныя обители возлетевшая.

Радуйся, венцем неувядаемым украшенная на Небеси.

Радуйся, святыми угодники радостно сретенная.

Радуйся, с Царицею Небесною у престола Господа предстоящая.

Радуйся, преподобная княгине Евфросиние, жен российских красото и радование.

## Кондак 11

Пение молебное во умилении сердец вознесоша вернии в соборе Архистратига Михаила, егда Божиим промыслением мощи твоя святых, преподобная мати Евфросиние, обретошася в нем, яко сокровище велие Церкви Русския, от нихже приемлем в недугех исцеление, в скорбех утешение, в бедах благодатную помощь. Темже тя, яко заступницу и предстательницу нашу величаем и благодарно Богу и Владыце нашему воспеваем: Аллилуиа.

## Икос 11

Светозарная звезда явилася еси, преподобная Евфросиние, Небо Церковное украшающая и светом чудес твоих благодатно просвещающая не токмо град Москву, но и всю страну Российскую, в нейже ты, яко великая угодница Божия прославляешия всеми верными, исцеление и помощь благодатную дарующи, да вси ко святым мощем твоим с любовью припадающии воспевают тебе тако:

Радуйся, свеще, Божественным огнем  
пламенеющая.

Радуйся, благодати Духа Святаго сосуде  
избранный.

Радуйся, тихим светом смирения и любви в  
земли нашей сияющая.

Радуйся, яко светом Небесным жизнь нашу  
благодатно озаряеши.

Радуйся, еще в житии сем дар исцелений от  
Бога приявшая.

Радуйся, и по кончине исцеления неоскудно  
источающая.

Радуйся, многоцелебныя мощи твоя нам  
открывшая.

Радуйся, яко тем многим христианом земли  
нашея утешение даровала еси.

Радуйся, подающая исцеления всем чтущим  
святыя мощи твоя.

Радуйся, яко с верою приходящия к ним  
благодатию просвещаются.

Радуйся, от зол и бед усердная наша  
хранительнице.

Радуйся, всем ищущим путь ко спасению  
наставнице благодатная.

Радуйся, преподобная княгине Евфросиние,  
жен российских красото и радование.

## Кондак 12

Благодатию, дарованною ти от Бога, преподобная мати Евфросиние, недуги исцеляеши, страну нашу от недругов защищаеши, жизнь нашу умиряеши и душам многих чад Божиих полезная подаеши. Темже яко имущая дерзновение ко Господу, вознеси теплую молитву за державу Российскую и людех ея, да внидут в Царство Небесное, воспевающе Богу песнь: Аллилуиа.

## Икос 12

Поюще равноангельное твое житие, молитвенно празднуем светлую память твою, святая княгине и инокине Евфросиние, славим тя с лики святых жен в земли Российстей просиявших и молим тя: помози всем девам и женам российским собравше елей добрых дел, с мудрыми девами выйти в сретение Жениха Христа и улучшить благую часть одесную Его стояния и славящих Его во веки. Мы же, твоею любовью и молитвою ограждаеми, зовем ти:

Радуйся, мудрая княгине и инокине всечестная.

Радуйся, первая от града Москвы к лику святых жен причтенная.

Радуйся, наставнице инокиням и собеседнице ангелом.

Радуйся, царственной славою на земли и на Небеси почтенная.

Радуйся, терпеливая страннице, Небеснаго Отечества достигшая.

Радуйся, с супругом твоим, святым благоверным князем Димитрием крепкая о нас молитвеннице.

Радуйся, с лики святых жен ныне пребывающая.

Радуйся, в сонме преподобных на Небеси торжествующая.

Радуйся, светлый образ жития всем женам христианским.

Радуйся, от земных к небесным дух наш возводящая.

Радуйся, душ и телес наших благодатная целительнице.

Радуйся, в мире живущих ко спасению путеводительнице.

Радуйся, преподобная княгине Евфросиние, жен российских красото и радование.

### **Кондак 13**

О преславная угоднице Христова и чудотворице, преподобная мати Евфросиние, отрадо и утешение верных града Москвы и всея земли Российския, прими от нас недостойных сие малое моление, с любовью тебе приносимое и ходатайством твоим ко Господу огради страну нашу от враг видимых и невидимых, даруй нам покаяние и сокрушение сердечное, даруй мир и надежду, избави нас от бед и вечныя муки, да купно с тобою и со всеми святыми земли нашея благодарственно вопием Богу: Аллилуиа.

Этот кондак читается трижды, затем 1-й икос: "Ангелов Творец и Господь..." и 1-й кондак: "Избранней от рода державнаго..."

### **Молитва**

О преподобная княгине Евфросиние, добрая в женах подвижнице, прехвальная угоднице Христова. Приими моление нас, недостойных, с верою и любовью к тебе припадающих, и теплым к Богу ходатайством испроси граду Москве, градом и весем земли нашея и всем

людем от бед и напастей сохранение, споспешествуй, яко чадолюбивая мати, чадом, тобою собранным, понести иго Христова во благодушии и терпении и добре подвизатися ко исправлению жития своего; в мире благочестно живущим испроси у Господа в вере твердость, во благочестии преспеяние и всем, с верою прибегающим к тебе и твоея помощи и заступления просящим, даруй недугов исцеление, в скорбех утешение и во всем житии благопоспешение, наипаче же умоли Господа в мире и покаянии земное житие прейти нам, мытарств горьких и мук вечных избавится и Царство Небесное твоим ходатайством получитьи, идеже ты со всеми святыми Господу предстоиши, да всегда славим Отца, и Сына, и Святаго Духа, ныне и в безконечныя веки. Аминь.

